

## పేతురు రాస్తీ మొదోహి ఉత్రం

నెల్వ కిబిసినిక

యా ఉత్రం రాస్తికాన్ యేసుప్రబుజ్ అపొస్తుడు ఆతి పేతురు. రమారమి క్రీస్తు సెకం 60 దు యా ఉత్రం రాస్తాన్. అయా కాలమ్దు ఆసియాదు బానె బత్తిజి మహి క్రీస్తు లోకాజ్ మాలెజ్ వాజి మహె. ఏలుబడిః కిని రాజుర్ క్రీస్తు లోకాజ్ వరి నమకం వందిజ్ హిమ్స కిత్తార్. వరిజ్ దయరం కిబిస్తెజ్ యా ఉత్రం రాస్తాన్. ముకెలమాతి మాటెజ్ ఇహిజ, కస్టమ్కు వానివలె ఓరిసి మండ్రెజ్, అతికారి లోకాజ్ లోజిజి మండ్రెజ్, దేవుణు వందిజ్ బత్తిదెజ్ ఇహిజ ఎలాగ నినికెజె.

<sup>1</sup> యేసు క్రీస్తుజ్ అపొస్తుడు ఆతి పేతురు రాసిని ఉత్రం. పొంతు, గలతీయ, కపదొకియ, ఆసియ, బితునియ ఇని దేసమ్కాణ్ సెద్రితి మని ఆజ దేసెమ్ది వరి లెకెండ్ మనివరిజ్, ఎయెర్ ఇహిజ దేవుణు వన్ని వందిజ్ ఏర్పాటు కితి వరిజ్ రాసిస.

<sup>2</sup> బుబ్బాతి దేవుణు మిజి ఎర్లిస్తెజె ఇజి ఒడ్ఃబితాండ్రె వన్ని వందిజ్ మిజి ఎర్లిస్తాన్. యేసు క్రీస్తుజ్ లోజిజి వన్ని నలదాన్ నొరె ఆజి సుబరం ఆజి మండ్రెజ్ దేవుణు ఆత్మ మిజి కేట కిత మనాన్. మిజి దేవుణు దయా దర్మం, నిపాతి నిండ్రెజి మనీద్.

ఎలాకాలం ఎర్దు సుడ్ఃజి మండ్రెజ్.

<sup>3-4</sup> మాటు దేవుణుదిజ్ నండొ పొగిడిఃనాట్. వాండ్రె, మా ప్రబు ఆతి యేసుక్రీస్తుజ్ బుబ్బ. దేవుణు గొప్ప కనికారమ్దాన్ మజి కొత్త బత్తు. సితాన్. ఎలాగ ఇహిజ, యేసు ప్రబుజ్ సాతి వరి లొఇహాన్ నిక్తాన్. నిక్తిజ్ ఎల్లకాలం ఎర్దు సుడ్ఃజి మండ్రెజ్ కొత్త బత్తు. మజి సితాన్. అక్కడె ఆవండ మజి ఉండ్రె అక్కు సితాన్. అక్కు పాడాఃజి సొన్ఇక, పూర్తి నెగ్గిక. ఎల్లకాలం మంజినిక. అక్కు పరలోకమ్దు మీ వందిజ్ ఇట్టా మనాన్.

5 మీరు దేవుణుని దేవుని నమ్మితింజ్ దేవుణు వన్ని గొప్ప సత్తుదాన్ మిజి కావ్ కిజి ఇడ్నాన్. కడెవెరి రోస్కాణ్ మజి వాని సిక్కుదాన్ ఎలాగ గెల్పిస్నాన్ ఇజి తోరిస్నాన్.

6 దిన్ని వందిజ్ మీరు నండొ సర్ద ఆదు. గాని ఏలు నెగం రోస్కు మిజి కల్లితి అనెకమాతి విజు రకమ్ కాణి కస్టమ్ క వందిజ్ దుకం ఆదెజ్ వలె.

7 ఎందనిజ్ ఇహిజు, పడాజి సొని బజారం సినుదు ఇడ్డి సుబ్రం కిసార్ గదె. అయ లెకెండ్ బజారం ముస్కు విలువ మన్ని మీ నమకమ్ బా కల్లి నీలిక ఇజి రుజుప్ కిదెజ్ వలె. ఆహె రుజుప్ కితిజు యేసు క్రీస్తు తోరె ఆనివలె నని నమకమ్ వందిజ్ మిజి పొగ్ గడినాన్. మిజి, గొప్ప గనం దొహ్ క్నాద్.

8-9 మీరు వన్నిజ్ సుడెజినిదెర్ గాని వన్నిజ్ ప్రేమిసినిదెర్. ఏలు సుడెవండ మహిజ్ బా వన్నిజ్ నమ్మిజినిదెర్. మరి, వెప్తాజ్ ఆట్ ఇ నని గొప్ప సర్దదాన్ సర్ద ఆజినిదెర్. ఎందనిజ్ ఇహిజు మిజి యేసు క్రీస్తు ముస్కు మన్ని నమకమ్ దానె, మీ పాణం ఎలాకాలం మంజిని సిక్కుదాన్ గెలిస్తెజ్ అట్నాద్.

10 మిజి వాని రక్కుణ వందిజ్ దేవుణు మాటెజ్ వెప్తా ప్రవక్తరు రెబాతరె బాగ నెస్టెజ్ సుడెజుతార్. దేవుణు మిజి సిదెజ్ ఇడ్డి యా దయా దర్మం వందిజ్ వారు వర్గితార్.

11 క్రీస్తు కస్టమ్ కు ఓరిస్తి వెనుక గొప్ప గనం కల్లినాద్ ఇజి ప్రవక్తరు లొఇ మన్ని క్రీస్తు ఆత్మ అక్క జర్గివండ మహి నండొ ముందాల్ నె వరిజ్ వెప్తా మహార్. వెప్తాజ్ దన్ని అర్దం ఇనిక ఇజి వారు రెబాతార్. అక్కెజ్ ఎనెజ్ జర్గినెలె, ఎలాగ జర్గినెలె ఇజి రెబాతార్.

12 ఆహు రెబాతిజ్, వారు వరి వందిజ్ నె ఆఎద్, మీ వందిజె వెప్సినార్ ఇజి దేవుణు ఆత్మ వరిజ్ నెస్పిస్తాన్. పరలోకమ్ దాన్ దేవుణు పొక్తి వన్ని ఆత్మ సత్తుదాన్ మిజి సువార్త వెప్తాకార్ యాక్కెజ్ మిజి నెస్పిస్తార్. పరలోకమ్ దు మని దూతెజ్ బా దిన్ని వందిజ్ నెస్టెజ్ ఇజి ఆన ఆజినార్.

దేవుణు వందిజ్ కేట ఆజి మండ్రు.

13 అందెజె మీ మన్నుదిజ్ తయార్ కిజి మండ్రు. మన్నుదు అణినె ఆజి మండ్రు. యేసుక్రీస్తు తోరె ఆనివలె మిజి దోహాక్కి దేవుణి దయా దర్మం వందిజ్ పూర్తి ఆసదాన్ ఎద్రు సుడఃజి మండ్రు.

14 దేవుణుదిజ్ లోజిజి వన్ని కొడోర్ లకెండ్ మండ్రు. ముజల్నె మీరు దేవుణుదిజ్ నెన్ఎండ మహివలె సెఇ ఆసెజి వందిజ్ లెకెండ్ ఆమాట్.

15 గాని మీరు కిని విజు దని లోసుబా దేవుణు వందిజ్ కేట ఆజి మండ్రు. ఎండనిజ్ ఇహిజి వన్ని సొంతం ఇజి మిజి ఇడ్డికాన్ పరిసుదం ఆతికాన్.

16 ఎండనిజ్ ఇహిజి దేవుణు పరిసుదం ఆతికాన్. అయ లెకెండ్ మీరుబా పరిసుదం ఆజి మండ్రెజ్ ఇజి దేవుణు మాటదు రాస్త మనాద్.

17 బుబ్బు ఇజి కూక్కి మీరు పార్దనం కిజిని దేవుణు విజెరిజ్ వరి పణిజి సుడఃజి ఇని తేడః సిల్లెండ తీర్పు కిజినాన్. అందెజె మీరు యా లోకమ్దు కూడః వాతి వరిలెకెండ్ బత్తిని వలె దేవుణుదిజ్ తియెల్ ఆజి మండ్రు.

18 మీ అనిగొగొర్ బత్తితి లెకెండ్ దేవుణుదిజ్ నెన్ఎండ బత్తిని మీ బత్తు పణిదిజ్ రెఇక. నన్ని బత్తుదాన్ యేసు ప్రబునె మిజి డిఃబిస్తాన్. సిల్లెండ ఆజి సొని వెండి బజారం మిజి డిఃబిన్ఎతాద్ ఇజి నెస్సిదెర్ గదె.

19 గాని ఇని తవు సిలి గొరె పిల్ల నని యేసుక్రీస్తు విలువాతి నలదాన్నె మీరు డిఃబె ఆతిదెర్.

20 యా లోకెమ్దిజ్ పుటి సెలెండ మహివలెనె దేవుణు యేసుక్రీస్తుజ్ యా పణి వందిజ్ ఎర్లిస్తాన్. గాని యా కడెఃవెరి రోస్కాజ్నె వన్నిజ్ పోక్తాన్. మీ వందిజె పోక్తాన్.

21 సాతి వరిబాణిజ్ దేవుణు నిక్తి యేసు క్రీస్తు వెటనె మిజి దేవుణు ముస్కు నమకమ్ మనాద్. నిక్తిజ్ వన్నిజ్ గొప్ప పెరికాన్ ఇజి ఇట్టాన్. అందెజె మీ నమకం దేవుణు ముస్కు ఇడ్డిదెర్. అందెజె దేవుణు ఒట్టు కితి దనిజ్ ఎద్రు సుడఃజి మంజినిదెర్.

22 నిజమాతి మాటదిజ్ మీరు లోజితిజ్ మీరు టేటజ్ ఆతిదెర్. అందెజె నమ్మితి వరిజ్ కల్తి సిల్లెండ ప్రేమినినిదెర్. అహిజి నిజమాతి

ప్రేమదాన్ మీ మనుస్సు పూర్తి సెమిస్తాజ్ వలె.

23 ఎందనిజ్ ఇహిజ సాజి సాని లోకాజ్ ఆవద్. గాని ఎల్లకాలం బత్కిని దేవుణుదునె మీరు పుట్టిదెర్. ఎల్లకాలం బత్కిని దేవుణు మాటదాన్ నె మీరు మరి పుట్టిదెర్.

24-25 ఎందనిజ్ ఇహిజ, “విజెరె లోకుర్ గడ్డి లకెండె వరి పేరు గడ్డి పుజు లెకెండె మనాద్. గడి వహ్నాద్. పుజు రాల్ప అర్నాద్. గాని ప్రబు ఆతి దేవుణు మాట ఎల్లకాలం మంజినాద్”, అయా మాట ఇనిక ఇహిజ మిజి సువార్త వెప్తి మని మాటనె.

## 2

1-3 యేసు క్రీస్తు ఎసా నెగ్గికాన్ ఇజి మీరు నెసి సుడేజి మహిదెర్. అందెజె ఆజ వన్ని ముస్కు కుట్ర కినికెజ్, విజు మొసెం పణిజ్, మీ మన్సుదు మనికెజ్, డాప్పి మరి ఉండ్రి వెప్పికెజ్, కినికెజ్, గోస, మరిఒరెన్ వన్నిజ్ దూసిన్సిక యాకెజ్ విజు డింస్తు. ఏలు పుట్టి ఇజి కొడొర్ లెకెండె దేవుణు మాట ఇని కల్లి సిలి పాలు ఉండెజ్ నండొ ఆస ఆదు. దని సత్తుదాన్ పిరిజి మీ బత్కు రక్సిస్తు.

పాణం మన్ని పణుకు, దేవుణుదిజ్ ఎర్లిసి మన్ని లోకుర్.

4 మీరు బత్కిజి మని క్రీస్తుబాన్ వాతిదెర్. ఇల్లు తొహ్పికార్ పణిదిజ్ రెఇక ఇజి నెక్కి పొక్తి పణుకు లెకెండె క్రీస్తు. లోకుర్ వన్నిజ్ నెక్తపొక్తార్ గాని దేవుణు వన్నిజ్ గొప్ప విలువాతికాన్ ఇజి ఎర్లిస్తాన్.

5 మీరుబా పణుకుజ్ లెకెండె దేవుణు మండ్రెజ్ ఇజి తొహ్ ఆని గుడిదిజ్ మీరు పణుకుజ్ లకెండె. గాని క్రీస్తు లెకెండె మీరుబా పాణం మని పణుకుజె. దేవుణుదిజ్ కేట ఆతి పుజెరి లోకుర్ లెకెండె మండ్రు. దేవుణుదిజ్ పొగ్డిజి, వందనమ్కు వెప్పి, వన్నిజ్ లోజిజి మంజి యేసు క్రీస్తు వలెహాన్ వన్నిజ్ తగితి పూజెజ్ సిదు.

6 దేవుణు మాటదు ఈహు రాస్త మనాద్ ఇనిక ఇహిజ ఇదిలో నాను సియొనుదు ఉండ్రి పణుకుదిజ్ ఎర్లిసిన. అయా మూల పణుకు గొప్ప విలువాతిక. వన్ని ముస్కు నమకం ఇడ్పికాన్ ఎయెన్బా సిగు ఆవన్.

7 అందెజె, యేసు క్రీస్తుజ్ నమ్మిత్తి మిజి, యా పణుకు గొప్ప విలువాతి పణుకు. గాని నమ్మిణ వరిజ్ ఇనిక ఆనాద్ ఇహిజ, “ఇల్లు తొప్పికార్ నెక్కి పొక్తి పణుకునె మూలదిజ్ మూల పణుకు ఆతాద్”.

8 మరి రాస్త మనాద్ ఇనిక ఇహిజ “అయ పణుకునె లోకాజ్ ఆడ్డు కినాద్. అయ పణుకుదిజ్ తొరోడిఃజి అర్నార్. ఎలాగ్ అర్నార్ ఇహిజ దేవుణు మాటదిజ్ లోజిఎర్. దేవుణు మాటదిజ్ లోజిఇకార్ అర్నార్ ఇజి దేవుణు ముందాల్నె నెస్తాండ్రె వెప్తా మహాన్.

9 గాని మీరు దేవుణు ఎర్లిస్తి జాతి. రాజుజ్ పుజెరి లోకుర్. దేవుణుదిజ్ కేట ఆతి వన్ని సొంత లోకుర్. ఆహె పాపం ఇని సీకటిదాన్ వాని గొప్ప బమ్మాతి జాయుదు మిజి కూక్త తతాన్. వన్ని గొప్ప బమ్మాతి పణిజ వందిజ్ సాటిస్తెజె ఇట్టాన్.

10 ముందాల మీరు దేవుణు లోకుర్ ఆఇకిదెర్. ఏలు దేవుణు లోకుర్ ఆతిదెర్. ముందాల దేవుణు కనికారం మిజి దొప్పాఎతాద్. ఏలు కనికారం దొహ్కాద్.

11 నాను ప్రేమినిసి తంబెరిజాండె, నాను మిజి బతిమాల్లి వెప్పిన, మీరు యా లోకమ్ది వరి లెకెండ్రె అఇదెర్, ఆఇ దేసెమ్ది వరి ననికిదెర్. దేవుణు వందిజ్ మని ఆసెజ అడ్డు వాజిని ఒడొల్ది ఆసెజ్ డిఃస్తు.

12 దేవుణుదిజ్ నెన్ఇ లోకుర్ నడిఃమి మీరు నెగ్రెండ్రె మండ్రెజ్. ఎందనిజ్ ఇహిజ ఇని దని లొఇబా మిజి సెఇకార్ ఇజి వారు వెప్తాజ, మీ నెగ్గి బత్కుదిజ్ సుడొఃజి దేవుణు తీర్పు కిదెజ్ వాని రోజుదు వారు దేవుణుదిజ్ పొగిడిఃదెజ్.

**అతికారమ్దు మన్ని వరిజ్ లోజిజి మండ్రు.**

13-14 ఏలుబడిః కినివరి లొఇ పెరికాన్ ఆతి రాజుజ్ గాని, అతికారమ్దు మని వరిజ్ గాని క్రీస్తు వెప్తా లెకెండ్రె లోజిజి మండ్రు. తపు కితి వరిజ్ సిక్స సీదెజ్, నెగ్గికెజ్ కితి వరిజ్ పొగిడిఃదెజ్ విరిజ్ పొక్తాన్ గదె.

15 ఎందనిజ్ లోజిదెజ్ ఇహిజ, మీ నెగ్గి పణిజ తొరిసి మీరు బుద్ది సిల్లెండ్రె వర్నిని వరి వెయు మూక్తెజ్ ఇజి దేవుణు కోరిజినాన్.

16 మీరు డిఃబె ఆతి లోకుర్. అహిజ, మీరు ఎయెర్ నెసెఎండ సెజ పణిజ్ కిదెజ్ ఆవద్. దేవుణు అడ్లి పణి కినివరి లెకెండ మండ్రు.

17 విజెరిజ్ మర్యాద సీదు. నమ్మిత్తి వరిజ్ ప్రేమిస్తు. దేవుణుదిజ్ తియెల్ ఆజి మండ్రు. రాజుజ్ మర్యాద సీదు.

18 పణి మణిసిర్ వరి ఎజుమానిరిజ్ నండొ మర్యాద సీజి లోజిజి మండ్రెజ్. మీ ముస్సు కనికారమ్దాన్ సార్లిదాన్ మని వరిజె ఆవద్. మీ ముస్సు కనికరం సిలి వరిజ్బా లోజిజి మండ్రు.

19 ఎండనిజ్ ఇహిజ, నాయం సిల్లెండ ఎయెన్బా మిజి బాద కితిజ అక్క మీరు దేవుణు వందిజ్ ఓరిస్తు. ఆక నెగ్గికదె. దేవుణుదిజ్ ఇష్టమాతి పణినె.

20 మీరు తపు కితి వందిజ్ ఉండ్రె దెబ తిహిజ అక ఓరిస్సిదెర్. గాని మిజి ఇని లాబం? గాని దేవుణు ఎద్రు సరి ఆతికెజ్ కితి దనిజ్ సిక్స వానివలె అక ఓరిస్తిజ ఆక నెగ్గికదె. దిని వందిజె దేవుణు మిజి ఏర్పాటు కిత్తాన్.

21 ఎండనిజ్ ఇహిజ క్రిస్తుబా మీ వందిజ్ కస్టం ఓరిస్తాండ్రె మీరుబా వాండ్రు నడిఃతి లెకెండ నడిఃదెజ్ ఉండ్రె గుర్తు తోరిస్త సితాన్.

22 “క్రిస్తు ఇని తపుబా కిఎతాన్. వన్ని మాటెజ్ లోఇ ఇని అబద్దమ్బ సిల్లెతాద్.

23 వన్నిజ్ దూసిస్తి వలె మర్జి దూసిస్ఎతాన్. వన్నిజ్ మల్లెజ్ కితివలె వరిజ్ బెద్దిస్ఎతాన్. నాయమ్దాన్ తీర్పు కిని దేవుణుదిజ్ వానిజ్ వాండ్రె ఒపజెవె ఆతాన్.

24 యేసుక్రిస్తు సిలువాదు సాతివలె మా పాపమ్కు పిండితాన్. ఎండనిజ్ ఇహిజ మాటు పాపమ్కు పూర్తి డిఃసిసిదెజ్ ఇజి, దేవుణు ఎద్రు సరి ఆతి బత్సు బత్తిదెజ్ ఇజి. వన్ని ఒడోల్ది దెబ్బెజాణిజ్ మాటు నెగెణ్ ఆతాట్.

25 ఎండనిజ్ ఇహిజ మీరు గొరెజ్ లెకెండ తప్తి సాహిదెర్. గాని ఏలు గవుడుఃఎన్ ఆతి వన్ని డగ్రు, మీ పాణం కావ్ కిని వన్ని డగ్రు మర్జి వాతిదెర్.

### 3

#### ఆల్సిమాసిర్

1-2 అయావజనె, ఆల్సిక్ ఆతికెజ్ వన్యా సొంత మాసిరిజ్ లోజిజి మండ్రెజ్. ఎండనిజ్ ఇహిజ, మాసిర్ దేవుణు మాట నమ్మిఇకార్ ఆతిజ్బా వన్యా నెగ్గి బత్కుదాన్ దేవుణుబాన్ వరిజ్ తతెజ్ అట్నె. ఎలాగ ఇహిజ వన్యా కల్తీసిల్లి బత్కుని, దేవుణు ముస్సు మన్ని తియెల్ సూణారె దేవుణుదిజ్ నమ్మినార్.

3-4 నెగ్గెండ తోరె ఆదెజ్ ఇజి బుర్ర డూసి మండ్రెజ్, బజారం గొలుస్సు ఇట్కిదెజ్, నెగ్గి పాతెజ్ పొర్పాదెజ్, గాని వనక వందిజె మన్సు ఇడెదెజ్ ఆవద్. మీ మన్సుదు ఇని ఇనికెజ్ ఇడెజినిదెర్ ఇజి సుడెదు. ఇనికెజ్ ఇహిజ సార్లిదాన్, నిపాతి మన్సుదాన్, పాడాజి సొన్ ఇ నన్ని నెగ్గి గుణమ్కు మన్సుదు ఇడెదు. నన్నికదె దేవుణుదిజ్ గొప్ప విలువాతికాద్.

5-6 అయావజనె, పూర్బమ్దు దేవుణు ముస్సు నమకం ఇడ్డి బోదెక్, దేవుణు ఒట్టు కితి దన్నిజ్ ఎద్రుసుడెజి మహెనె, వన్యా సొంత మాసిరిజ్ లోజిజి వన్యా నెగ్గి గుణమ్కు అయాలెకెండ తోరిస్తె. అబ్రాహాం ఆల్సి ఆతి సార నన్నికదె. అది అబ్రాహాముజ్ లోజిత్తాదె, వాండ్రు నా ముస్సు అతికారం మన్నికాన్ ఇజి మర్యాద సిత్తాద్. మీరుబా అయావజనె సరి ఆతికెజ్ కిజి ఇనిదన్నిజ్బా తియెల్ సిల్లెండ మహిజ సార పొటది గాల్సిక్ ఆనిదెర్.

7 అయావజనె, మాసిర్ వరి బోదెకాజ్, మజి ఇంక సత్తు తక్కు మనికెజ్ ఇజి నెసి, వన్యాజ్ గవరం సీజి, నెగ్గెండ సుడెజి మండ్రెజ్ వలె. దేవుణు కనికారమ్దాన్ సిత్తి ఎలాకాలం బత్కిని బత్కు ఉండ్రె లెకెండ మీ వెట వనకాజ్బా సీనాన్. అందెజె వన్యాజ్ మీరు మర్యాద సిదెజ్. అయాలెకెండ కితిజ మీ పార్దనమ్దిజ్ ఇని అడ్డుబా మన్వద్.

#### సరి ఆతికెజ్ కితి వందిజ్ వాజిని బాద

8 ఆక్కర్దు నాను విజేరిజ్ వెప్పిన, ఉండ్రె మన్సు ఆజి మండ్రు. ఒరెన్ మరి ఒరెన్ వెట వన్నిజ్ సర్ద మహివలె గాని దుకం మహివలె

గాని కూడఃజి పాడఃజి మండ్రు. తంబెరిబు లెకెండ ఒరెన్ మరిబరెన్ వన్నిజ్ ప్రేమకిజి మండ్రు. ఒరెన్ మరిబరెన్ వందిజ్ పాణం నొత్తెజ్. నాను పెరిక ఇజి గర్ర ఆవిండ విజెరె వెట ఉండ్రె మన్ను ఆజి మండ్రు.

9 ఎయెన్బా మిజి కిడు కితిజ మర్జి వన్నిజ్ కిడు కిమాట్. దూసిస్తిజ మర్జి దూసిస్మాట్. ఆహె కివిండ వరిజ్ నెగ్గికెజ్ రపిద్ ఇజి దేవుణుదిజ్ వెత్తు. ఎందనిజ్ ఇహిజ మిజి దేవుణు బాణిజ్ నెగ్గికెజ్ దొహ్కెజె, దేవుణు మిజి దీవిస్సెజె, వన్ని వందిజ్ ఎర్లిసి ఇట్టా మనాన్.

10 అందెజె “నెగ్గి బత్తు బత్తిదెజ్ సుడఃజినాన్, నెగ్గి రోస్సు గడఃపైజ్ సుడఃజినాన్ ఎయెన్బా సెఇ మాటెజ్ వర్లివిండ, అబద్దం మాటెజ్ వర్లివిండ మండ్రెజ్ వలె.

11 వాండ్రు సెఇకెజ్ డిఃసి మండ్రెజ్, నెగ్గికెజ్ కిజి మండ్రెజ్. సమదనమ్ వందిజ్ సుడఃజి అక్కాదె దొహ్కెజ్ ఇజి దన్ని వందిజ్ రెబాదెజ్.

12 ఎందనిజ్ ఇహిజ, దేవుణు ఎర్దు సరి ఆతికెజ్ కిని వరిజ్ దేవుణు కాప్కిజినాన్. వరి పార్దనమ్కు వెనాన్. గాని సెఇ పణిజ్ కిని వరివెట దేవుణు వన్ని మొకొం కోపం దాన్ ఇడ్నాన్”.

13 మీరు నెగ్గి పణిజ్ కిదెజ్ ఇజి నండొ ఆస ఆజి మహిజ, ఎయెర్బా బాద కివర్గదె.

14 గాని దేవుణు ఎర్దు సరి ఆతికెజ్ కితి వందిజ్ ఉండ్రె వేలా బాద వాతిజ్బా సర్ద అదు. వరిజ్ తియెల్ ఆమాట్. వరిజ్ బెద్రిమాట్.

15-16 మీ మన్నుదు క్రిస్తుజ్ మీ ప్రబు ఇజి బసె కిదు. మరి, మీ నమకమ్ వందిజ్ మిజి వెన్బాని వరిజ్ నెగ్గెండ వెప్తాజ్ ఎస్తివలెబా తయార్ ఆజి మండ్రు. గాని సార్లిదాన్, దేవుణుదిజ్ తియెల్దాన్ వెప్తాజ్. ఎందనిజ్ ఇహిజ మిజి బెద్రిసినికార్ మిజి దూసిసిని వలె మీ మన్ను దేవుణు ఎర్దు నిపాతి మండ్రెజ్. మీరు క్రిస్తు లోకుర్ ఇజి, నెగ్గి గుణమ్కు కల్లిజి మనికార్ ఇజి సుడఃజి వారు సిగు ఆదెజ్.

17 సరి ఆతికెజ్ కితి వందిజ్ కస్టం బరిస్సెజ్ ఇజి దేవుణు ఇస్టం ఆతిజ అక్క నెగ్గికాద్. సెఇకెజ్ కితి వందిజ్ కస్టం బరిసిని మున్ను అక్కాదె నెగ్గికాద్.



18 ఎందనిజ్ ఇహిజ క్రీస్తుబా ఉండ్రై సుటునె పాపమ్కు లాగ్దెజ్ సాతాన్. మజి దేవుణుబాన్ తతెజ్ ఇజి దేవుణు ఎద్రు నీతిమనికాన్ ఆతికాన్ దేవుణు ఎద్రు నీతి సిల్లెండ మహి వరి వందిజ్ సాతాన్. వన్ని ఒడొల్ సప్టార్. గాని దేవుణు ఆత్మ వన్నిజ్ నిక్లాన్.

19 క్రీస్తు ఆత్మ అయా లోకమ్దు తొహ ఆతిమని వరి నడిమి సాహండ్రై సువార్త సాటిస్తాన్.

20 వీరు నోవవు కాలమ్దు దేవుణుదిజ్ లోజీవండ మహికార్. నోవవు ఒడొ తయార్ కిజిమహివలె దేవుణు విరివందిజ్ ఒరిస్త మహాన్. గాని ఒడొ తయార్ ఆతిజ్ సెగొండారె, ఇహిజ ఎనిమిది మణిసిరె పెరి గడ్డదాన్ తప్రె ఆతార్.

21 యాక బాప్తీసమ్దిజ్ పోలిత మనాద్. యా బాప్తీసమ్దానె దేవుణు మిజి రక్సిసినాన్. యా బాప్తీసం ఒడొల్ సుబ్బరం ఆదెజ్ అవిద్. గాని ఏలు దేవుణు ఎద్రు పాపం సిల్లెండ మండ్రెజ్ ఒప్పుకోడొజినాప్ ఇజి తోరిస్తెజె యా బాప్తీసం. యేసు క్రీస్తు సావుదాన్ నిజీత్తిజ్ మీరు సావుదాన్ తప్రె ఆతిదెర్ ఇజి తోరిస్తెజె.

22 యేసు క్రీస్తు సావుదాన్ నిజితండ్రై పరలోకమ్దు ఎక్కి సాహండ్రై, దూతారిజ, అతికారిజ, నత్తు మన్నివరిజ వన్ని అడ్డి ఇట్టాండ్రై, దేవుణు ఉణెర్ పడొకాద్ బస్తాన్.

## 4

### పేతురు రాస్తి మొదొహి ఉత్తం

1 అందెజె క్రీస్తు, వన్ని ఒడొల్దు కన్టం ఒరిస్తి లెకెండ కన్టం ఒరిస్తెజ్. మీరుబా మన్ను తయార్ కిజి మండ్రు. ఎందనిజ్ ఇహిజ ఒడొల్దు కన్టం ఒరిస్సికాన్ పాపమ్దు నడివన్.

2 అహిజ ఏలుహాన్ అసి సావుదాక, మాములుక లోకుర్ ఆన ఆని వజ ఆఎద్, దేవుణుదిజ్ ఇన్టం ఆతి లెకెండ బత్తిదెజ్.

3 గడిస్తి సాహి కాలమ్దు దేవుణుదిజ్ నెసిఇకార్ బత్తిని లెకెండ మీరు బత్తిజి మహిదెర్. ఎలాగ ఇహిజ, రంకు బూలాజి, ఒడొల్

వందిళ్ ఆసెళ్ ఆజి, కల్లు ఉణిజి సోసి, సిగు సిల్లెండ డాట్టి కర్గిజి, కల్లు విందుళ్ నడఃపిసి, దెయమ్కాళ్ పూజ కిజి మహిదెర్.

4 ఏలు మీరు వరివెట కూడఃఎండ, వారు కిని వెరి పణిళ్ లొఇ సోన్ఎండ ఆజినిళ్ వారు బమ్మ ఆజి మిజి దూసిసినార్.

5 గాని బత్కిని వరిళ్ సాతి వరిళ్ తీర్పు తీరిస్తెళ్ తయార్ ఆజి మని డేవుణుబాన్ వారు బత్కితి బత్కు వందిళ్ ఎందనిళ్ నన్ని నెఇకెళ్ కిజి బత్కిత్తార్ ఇజి వెవ్తాళ్ వలె.

6 అందెజె సాతిసాహి నమ్మిత్తి వరిళ్ సువార్త సాటె ఆజి మహాద్. ఎందనిళ్ ఇహిజి యా బత్కుదు మహివలె లోకాళ్ తీర్పు లెకెండ సావు వానాద్. గాని సాతి వెనుక దేవుణు బత్కిజిని లెకెండ బత్కిదెజె.

7 అహిజి విజు దన్నిళ్ ఆక్కరి రోస్కు వాజినాద్. అందెజె నెగ్గి బుది కల్గిజి మండ్రు. మన్నుదు అణసె ఆజి మండ్రు. నస్తవలె మీరు ప్రార్దనం కిదెళ్ అట్టిదెర్.

8 అక్కదె ఆవెద్. విజు దని ముస్కు మని సజతి ఇనిక ఇహిజి, ఒరెన్ మరి ఒరెన్ వన్నిళ్ నెగ్గెండ ప్రేమ కిజి మండ్రు. ఎందనిళ్ ఇ హిజి మహికార్ కితి విజు తపుళ్ మాటు ప్రేమదాన్ సెమిస్తెళ్ అట్నాట్.

9 మొరొ ఆవెండ ఒరెన్ మరి ఒరెన్ వన్నిళ్ డగ్గు కిజి సీనికార్ ఆజి మండ్రు.

10 ఒరెన్ మరి ఒరెన్ వన్నిళ్ దేవుణు సతి వరమ్దాన్ తోడుః కిజి మండ్రెళ్. దేవుణు సతి విజు రకమ్ది వరమ్కు నెగ్గెండ వాడు కొండెళ్.

11 ఎయెన్బా దేవుణు మాట బోదిస్సాన్ ఇహిజి వాండ్రు దేవుణు మాట బోదిస్తెళ్ వలె. ఎయెన్బా మహి వరిళ్ తోడుః కిదెళ్ ఇహిజి దేవుణు సతి సత్తుదాన్ కిదెళ్ వలె. యేసు క్రీస్తు పేరుదాన్ దేవుణుదిళ్ పొగడుః కల్గిదెళ్ ఇజి యాకెళ్ విజు కిదు. వన్నిళ్నె అంతు సిల్లెండ ఎల్లకాలం గనమ్ని, సత్తు మనీద్. ఆమెన్.

12 నాను ప్రేమిసిని తంబెరిజాండె, మీ నమకం ఎలాగ్మహ్తాకద్ ఇజి రుజుప్ కిదెళ్ సిసు నని పెరి కస్టమ్కు వానివలె ఇనిక జర్గినాదొ ఇజి బమ్మ ఆమాట్.

13 క్రీస్తు మహిమదాన్ యా లోకమ్దు వానివలె మీరుబా గొప్ప సర్ద ఆజి మండ్రెజ్ ఇజి క్రీస్తు ఓరిస్తి కస్టమ్క లొఇ మీరుబా కూడ్డి ఓరిసి సర్ద ఆదు.

14 క్రీస్తు వందిజ్ ఎయెన్బా మిజి దూసలాడిఃతిజ సర్ద ఆదు. ఎందనిజ్ ఇహిజ గొప్ప పెరికాన్ ఆతి ఆత్మ, ఇహిజ దేవుణు ఆత్మ మీ ముస్కు మనాద్.

15 మీ లొఇ ఎయెన్బా ఓరిస్టెజ్ ఇహిజ అక్క ఒరెన్ వన్నిజ్ సప్తి వంద్రిజ్ ఆవెద్. డొఃజ కితి వంద్రిజ్ ఆవెద్. సెన పణి కితి వందిజ్ ఆవెద్. ఆఇ వరి వెట ఒడెః ఆదెజ్ ఆవెద్.

16 గాని మీ లొఇ ఎయెన్బా క్రీస్తు లోకు ఆతిదని వందిజ్ ఓరిస్తిజ సిగు ఆమాట్. గాని క్రీస్తు పేరు అస్సిదని వందిజ్ దేవుణుదిజ్ స్తుతి కిదెజ్.

17 ఎందనిజ్ ఇహిజ దేవుణు తీర్పు వన్ని లోకుర్ లొఇ మొదొల్నిని కాలం వాత మనాద్. దేవుణుదిజ్ నమ్మిత్తి వరి లొఇనె తీర్పు మొదొల్నిజ్ సువార్తదిజ్ లొజిఇతివరి గతి ఇనిక ఆనాదొ.

18 “దేవుణు ఎర్దు నితి నిజాయితిదాన్ మన్ని వరిజ్ నిస్సా కస్టం వాతిజ దేవుణుదిజ్ నెసిఇకార్ ఎలాకాలం మన్ని సిక్చదాన్ తప్రె ఆదెజ్ ఒద్దె అట్వెర్లె”,

19 అందెజె దేవుణుదిజ్ ఇస్టం ఆతి వజ కస్టమ్కు ఓరిస్సికార్ వరి బత్కు, పుటిస్తి దేవుణుబాన్ ఒపజెప్తెజ్వలె. వాండ్రు నమ్మిదెజ్ తగ్గికాన్. వారు నెగ్గి పణిజ్ కిజి బత్కిజి మండ్రెజ్.

## 5

పెద్దెలుజ వందిజ్ వెహ్సిని మాటెజ్.

1 క్రీస్తు కస్టమ్కు ఓరిస్తిక నాను సుడఃత. క్రీస్తు ఎసొ గొప్ప పెరికాన్ ఇజి తోరిసి గొప్ప జాయ్దాన్ మర్జి వానివలె నానుబా వన్ని జాయ్దు మంజినాలె. అందెజె, మీ లెకెండ్ ఒరెన్ పెద్దెలి ఆతి నాను పెద్దెలుజు ఆతి మిజి దటిసి వెహ్సిన.

2 గొర్రెజ్ అడినికాన్ గొర్రెజు నెగ్రెండ సూణి వజ మీ అడిగి మన్ని దేవుణు లోకాజ్ నెగ్రెండ నడింపు. బల్మి కిత్తిజ్ ఆవద్. పూర్తి మన్నుదాన్ కిదు. దేవుణు ఇస్టమ్దు కూడితి లెకెండ సుడేదు. ఇనికదో లాబం వానాద్ ఇజి ఆస ఆజి సుడేమాట్. గాని నెగ్గి మన్నుదాన్ సుడేదు.

3 మీ అడ్డి మని లోకాజ్ మున్ను గర్దదాన్ ఏలుబడికి కినిక ఆవద్. మీ నెగ్గి గుణమ్కు సుడేజి వారుబా అయాలెకెండ నడిని వజ మండ్రు.

4 అహిజ గొర్రెజ్ అడిని వరి లోఇ పెరి గవుడుయెన్ ఆతికాన్ తోరె ఆనివలె ఎసెజ్బా పాడాజి సొన్ఇ మెరిసిని టోపి మిజి దోహ్కాద్.

5 అయ వజనె ఇజిరికిదెరా, మీరుబా పెద్దెల్జ లోజిజి మండ్రు. ఒరెన్ మరి ఒరెన్ వెట తగిజి మండ్రు. ఎందనిజ్ ఇహిజ “గర్ద ఆని వరిజ్ దేవుణు ఎద్రిసినాన్. గాని తగె ఆతి మని వరిజ్ వన్ని దయా దర్మం సీజినాన్”,

6 అందెజి దేవుణు, సరియాతి టయ్ముదు మిజి పెరికాన్ కిదెజ్ ఇజి వన్ని గొప్ప సత్తుమని అతికారమ్దిజ్ తగె ఆజి మండ్రు.

7 మీ విసారమ్కు విజు దేవుణు మున్ను పొక్తు. ఎందనిజ్ ఇహిజ దేవుణు మిజి విజు సీదెజ్ సుడేజినాన్.

8 మీ మన్నుదు అణసె ఆజి మండ్రు. నెగ్గి బుద్ధి కల్గిజి తెలిదాన్ మండ్రు. ఆక్కర్నిని ఉండ్రె పెరి నొరెన్ లెకెండ మిజి విరోదమాతి సర్హాన్ ఎయెరిజ్ డిజ్దెజి ఇజి రెబాజి బూలాజినాన్.

9 మీ నమకమ్దిజ్ గటిజి అసి సర్హానుజ్ ఎద్రిసి మండ్రు. విజు లోకమ్దు మని నమ్మిత్తికార్ నిన్ని కస్టమ్కాణ్ బాద ఆజినార్ ఇజి నెసి మండ్రు.

10 గొప్ప దయా దర్మం మన్ని దేవుణు, క్రీస్తు వెట ఎలాకాలం మంజిని జాయ్దు మంజిని వందిజ్ మిజి కూక్టాన్. మాటు క్రీస్తు వెట కూడితిజ్ యాక జర్గిజినాద్. సెగం కాలం మీరు కస్టమ్కు ఓరిస్తి వెనిక దేవుణు మిజి విజు దన్ని లోఇ పూర్తి ఆతికార్ కద్దివండ, సత్తుదాన్ నిల్పాన్.

11 వన్నిజె అంతు సిల్లెండ ఎలాకాలం గొప్ప సత్తు మనీద్. ఆమెన్.

12 దేవుణు గొప్ప ప్రేమ కిజి తోరిస్తి నిజమాతి దయాదర్శమ్దు గటిజు నిల్సి మండ్రు, ఇజి నాను రాసిన. వెహ్సిన. అయ క్రుపాదు గటిజు నిల్సి మండ్రు ఇజి నాను బతిమాల్జిన. యాక నాను బాగ నమకమ్ ఇడ్తి సిల్వాను దిన్ని వందిజ్ నాను సాసి వెహ్సిన. యాక నాను బాగ నమకం ఇడ్తి సిల్వాను ఇని వన్ని కియుదాన్ రాస్సిసిన.

13 మీ లెకెండ్ బబులోను పట్టుమ్దు దేవుణు ఏర్పాటు కిత్తి సజమ్దికార్ మిజి వందనమ్కు వెహ్సినార్. నజి మరిన్ లెకెండ్ మని మార్కు మిజి వందనమ్కు వెహ్సినాన్.

14 క్రీస్తు ప్రేమదాన్ ఒరెన్ మరిఒరెన్ వన్నిజ్ ముదు కిజి వందనమ్కు వెహ్సె. క్రీస్తుబాన్ కూడితి మిజి విజెరిజ్ సమదనం మనీద్.

**Konda: కొండ బాసడు నెగ్గి కబ్బు**  
**Konda Dora New Testament which was published in**  
**2006**

copyright © 2006 Wycliffe Bible Translators, Inc.

Language: Konda-Dora

Contributor: SIL International (in Asia)

All rights reserved.

2025-05-06

---

PDF generated using Haiola and XeLaTeX on 6 May 2025 from source files  
dated 7 May 2025

840896da-3a66-5e43-9018-4a95a349d60c